

# KUKONDWA MBONGO

## TO KUKONDWA NTALU



Ya kieleka ya kele bweso na kuvutuka na tabernacle na suka yayi. Mu ke kukiyufula kaka . . . Mpangi Neville me tuba ti bantu mingi lendaka ve kuwa kuna na manima. Beno lendaka kuwa mingi mbote ntangu yayi, kuna na manima? Ya kele mbote mingi? Mbote mingi. Mu kele—mu kele fioti, na yina mu ke sala makelele mingi samu bantu kuzaba ti mu kele awa.

<sup>2</sup> Na yina, mu ke bambuka moyo na ntangu mosi mu vwandaka sala na ba-Service Public. Mu vwandaka mata na kikalu . . . Mpe mu vwandaka lwata basapatu ya nene mingi, yina vwandaka na bansonso, samu na kusala inspection na bansinga ya haute tension. Mpe mu vwandaka mata bikalu. Mpe Mama Ehalt, yina kele nkundi ya munu, vwandaka na nsinga ya allo-allo. Mu ke kwikila ti Tata Ginther kuna ke zaba yandi, mbote. Na yina Edith tubaka, “Billy, nge ke sala makelele, samu nge kele mwa muntu mosi ya fioti, yina mu me monaka ve.” Ntangu mu vwandaka tambula bansonso yayi ya nene, ya vwandaka bula na ntoto, mu vwandaka mata na bikalu.

<sup>3</sup> Mu tubaka, “Mbote, Edith, mu kele fioti mingi, mu ke zola ti muntu nionso kuzaba ti mu kele na nziunga, mu ke sala makelele mingi.”

<sup>4</sup> Mbote, mu kotaka kaka kuna samu na kubokila. Mpangi Neville tubaka na munu ti nkundi ya beto, Mpangi Roy Roberson, kele ve na lukutakanu na suka yayi, samu yandi ke na kubela. Ya yandi . . . Yandi vwandaka na dinu mosi ya kukangama. Ya vwandaka na mikolobo, mpe ya pesaka yandi mwa fièvre. Mpe yandi ke zola ti ba katula yawu, mu banza, na nswalu. Mpe Roy kele mutindu tata samu na beto awa, mpe beto ke zolaka yandi. Mpe mu tubaka, “Mpangi Roy, mu—mu ke kwenda kuna ntangu yayi, kaka na mwa minuti fioti, samu na lukutakanu.” Mu tubaka, “Mu ke lomba na dibuundu ti beto nionso ke sambila samu na nge, na suka yayi,” mpe mbasi yandi ke kwenda kuna, samu ti ba tala diambu yayi. Dinu basikaka na lweka, to kima mosi, basikaka yimbi, mpe ba ke zenga yawu, mpe ba ke katula yawu.

<sup>5</sup> Mpangi Roy kele vétéran, mutindu beno nionso me zaba, ya Mvita ya Zole ya Yinza, yina ba zolaka mwangisa na obus. Mpe kana ya vwandaka ve mawa ya Nzambi, yandi zolaka zinga diaka ve. Yandi tandamaka kuna mutindu mvumbi, na ntangu ya yinda; maboko ya kubukana, mpe makulu ya kubukana, mpe ba-nerfs nionso zole ya ngudi vwandaka ya kufwa. Mpe dokotolo

tubaka, “Kana yandi lendaka zinga, yandi ke tambula ata fioti ve.” Na lemvo ya Nzambi, yandi ke tambula konso kilumbu, ke mata mpe nionso yina. Nzambi vwandaka mbote samu na yandi samu yandi kele muntu ya mbote, mpe beto ke zolaka yandi. Mpe beto, beto kele—beto nionso kele ve. . .

<sup>6</sup> Kana beto ke zinga mbote, yina zola tuba ve ti beto kele ya kukondwa bampasi. Ya kieleka, ya zola tuba ti bampasi nionso kele ya kuludika na beto. “Mbala mingi muntu ya mbote ke monaka mpasi, kasi Nzambi ke vulusaka yandi ntangu nionso.” Yina kele kitini ya nkembo.

<sup>7</sup> Na yina beto ke lomba kaka kisambu ya mutindu yankaka na suka yayi, samu na Mpangi Roy. Mu ke kukiyufula kana ya kele na yankaka awa, ntete, ke zola ti ba sambila samu na yandi, yina ke zola ti bambuka yandi na kisambu? Kana bawu ke zola kaka kutelemisa maboko ya bawu. Mbote mingi. Ya kele mbote. Beto telama kaka mwa ntangu fioti, kana beno zola, na yina beto ke sambila.

<sup>8</sup> Mfumu, beto ke kwisa bubu yayi, na mbandukulu ya saba. Mpe mwini me banda nzietolo ya yawu ntangu yayi, na yinza ya muvimba, samu na kunata nsemo mpe luzingu na bima yina ya me tumama na kusala mutindu yina. Mpe na mbandukulu ya lukutakanu yayi, beto kele kitini ya Dibuundu ya Nge, yina ba me bokila na kusala balukutakanu ya kubeluka, samu na kubeluka ya nzutu, samu na kulungisa baluzolo mpe bansatu ya Mfumu ya beto ya kusakumuka Yina lwalaka samu na bayimbi ya beto, mpe na bamputa ya Yandi beto me beluka, mpe beto ke zola kuyufula, na mbandukulu ya lukutakanu, mutindu ya me banda, na bankunga, mpe bantima ya beto me banda na kuzanguka, ti beto ke bambuka moyo, na suka yayi, Mfumu, mpangi ya beto ya bakala ya luzolo, ya ntalu, Roy Roberson, kisadi ya Nge ya kukikulumusa. Mpe beto zaba ti Nge me keba luzingu ya yandi na kilanga ya bitumba, mpe Nge vwandaka mbote samu na yandi. Mpe bubu yayi yandi me kubwa na kimbevo, ti yandi lendaka ve kukwisa na yinzo-Nzambi.

<sup>9</sup> Mpe, Mfumu, na ntangu ba vwandaka sambila na yinzo ya Jean Marc, ya vwandaka na Wanzio mosi kulumukaka kuna na boloko, kisika Pierre vwandaka ya kukanga bansinga, kuna bielo zibukaka, na kintulumukina, mpe basisaka yandi.

<sup>10</sup> O Mfumu, Nge kele kaka Nzambi. Bawanzio yina kele na lutumu ya Nge na suka yayi. Beto ke sambila, Mfumu, ti ntangu beto ke sambila awa na yinzo ya Nzambi, ti Bawanzio ke kulumuka na yinzo ya Mpangi Roberson. Nsatu ya yandi kele ti yandi vwanda na kisika ya yandi awa, kasi kimbevo me kanga yandi. Mpe bika ti Bawanzio ya Nzambi kuvulusa yandi, kubelusa yandi, na yina yandi lenda kubaka kisika ya yandi diaka na yinzo ya Nzambi.

<sup>11</sup> Ya kele na bayankaka yina me luta na bampasi, bawu—bawu me vwanda ya kubela. Mpe beto me mona kento ya kiboba, na yina yandi zolaka vwanda, yandi me telemisa maboko ya yandi, ntangu yandi vwandaka meka na kutambula. Yandi me kwisa na yinzo ya nzambi, samu na kubeluka. Pesa yawu, Mfumu, ti yandi ke basika na kutambulaka, na kukondwa mpasi mpe na ngolo ya buntwenia ya kento.

<sup>12</sup> Bayankaka nionso me telemisa maboko ya bawu, mingi ya bawu me telemisa maboko, samu ti ya kele ya kusonama, mpe ba me samuna na ntwala ti, “Muntu ya mbote ke monaka mpasi mingi, kasi Nzambi ke vulusaka yandi ntangu nionso.” Bika ti beto pumbuka bubu yayi na lukwikilu, na maboko ya lukwikilu, yina ke vulusa beto na bimbevo nionso mpe bampasi. Ntangu lukutakanu ke kuma na nsuka, bika ti ya vwanda ve na muntu mosi ya kulemba na kati ya beto.

<sup>13</sup> Pesa yawu, Mfumu, ti muntu ya kukondwa lukwikilu nionso kukuma mukwikidi. Mpe mutindu beto ke fimpa na zulu ya Ndinga ya Nge, bika ti Mpeve-Santu kubaka Yawu mpe kutula Yawu na kati ya bantima ya beto, mpe kumwangisa masa na zulu ya Yawu tii Yawu ke kuma mbuma ya Ndinga. Sala yayi samu na beto, Mfumu, mutindu beto ke kulumusa bayintu ya beto na kukikulumusa nionso mpe ke lomba yawu na Nkumbu ya Yesu. Amen.

Beno lenda vwanda.

<sup>14</sup> Na ntwala ya kukota na nsangu ya lukutakanu ya suka yayi, mu ke zola kubenda bukebi ya beno, pene-pene fioti. Kana ya kele na bayankaka na kati ya beno yina kele na konze, mpe ke zola kwisa na mosi ya balukutakanu yina ke salama na Middletown, na Ohio, yina ke banda na Kilumbu ya ntete, sabala mosi, mu ke vwanda na terrain ya camping.

<sup>15</sup> Nge me zaba nkumbu ya terrain ya camping, Gene? [Mpangi Gene me tuba, “Ba me tuba na munu ti ya kele na ba-kilometre funda mosi na nkama sambanu na makumi yivwa na tatu na Middletown.”—Mu.] Mpangi Sullivan. Middletown kele mbanza mosi ya fioti, mu banza kaka mutindu Jeffersonville awa. Ya kele centre ya basketball. Mpangi Sullivan kele pasteur kuna. Muntu nionso ya mabuundu ya Nsangu ya mbote ya Muvimba, na yina ya kele kulutula makumi sambanu yina ke wisanaka na lukutakanu yayi, ke vwanda na kiyeka ya kutuba na beno kisika terrain ya camping kele.

<sup>16</sup> Mpe ya ke vwanda na mwa bayinzo ya fioti na terrain ya camping, mutindu ba me tuba na munu, samu kukeba bantu yina ke zola kukwisa. Mpe balukutakanu ke banda na Kilumbu ya ntete tii na Kilumbu ya sambanu, bilumbu sambanu. Mpe ya ke vwanda ve na balukutakanu na Lumingu, samu na mabuundu yankaka, ti ba ke vwanda na balukutakanu ya bawu ya mumesanu. Ya lendaka vwanda, na balukutakanu ya

kubeluka ya nzutu, to bisambu samu na bambevo, konso nkokila. Mpe ba me bokila muntu nionso. Mpe ya ke banda na kilumbu ya 10 ya Ngonda ya nana, tii na kilumbu ya 15, na Kilumbu ya ntete tii Kilumbu ya sambanu. Mpe kana beno ke vwanda na konze, mpe—mpe kana konze ya beno ke na kubelamaka, mpe beno ke zola kulutisa yawu na mutindu yina, mbote, ya kieleka beto ke vwanda na kiese na kuvwanda na beno.

<sup>17</sup> Mu ke zola diaka kukindisa bayina nionso me baka ve mbotika ya Baklisto, na kubikala na suka yayi mpe kubanza na zulu ya yawu. Mpe kukubama samu na kisalulu ya mbotika yina ke landa pene ya mwa minuti makumi yiya na tanu, mu banza. Yina ke vwanda awa na yinzo-Nzambi.

<sup>18</sup> Beto me tumama na kukindisa bantu na kubaka mbotika ya Baklisto, na kuzabaka ti ya kele mfunu samu na mpulusu. Samu ya me sonamaka na Mfumu ya beto, na lutumu ya Yandi ya nsuka, lutumu ya Yandi ya nsuka na Dibuundu. To, mutindu Yandi pesaka lutumu ya nsuka, na Dibuundu, Yandi tubaka, “Benokwenda na yinza ya muvimba, mpe beno longa Nsangu ya mbote na bivangu nionso. Yandi yina ke kwikila mpe ke baka mbotika ke kuzwa mpulusu.” Na yina beto zaba ti ya kele mfunu ti beto baka mbotika na kati ya masa.

<sup>19</sup> Mpe beto ke vwanda na kiese na kusala kisalulu yayi samu na beno, samu na muntu nionso yina me ndima na kati ya ntima ya bawu ti Yesu Klisto kele Mwana ya Nzambi, ti Yandi kufwaka samu na kuvulusa bansumuki, mpe beno vwandaka mosi ya bayina Yandi kufwaka samu na kuvulusa; mpe yina zola kukwisa mpe kubaka mbotika na Nkumbu ya Yesu Klisto samu na mulemvo ya masumu ya beno; samu na kutuba, na yinza, ti beno ke kwikila ti ba me lemvo kila beno masumu ya beno, mpe ti beno ke kuma ntangu yayi kilandi ya Mfumu Yesu, samu na kubaka kisika ya beno.

<sup>20</sup> Kana beno kele ve na dibuundu ya kukwenda, beto ke vwanda na kiese ti beno kwisa vwanda na mbundana na beto. Beto kele ve na bamambeke awa. Ya kele tabernacle ya kuzibuka, samu na Nzutu nionso ya Klisto, ya konso denomination. Beto ke telama mutindu dibuundu yina ke yambaka muntu nionso. Mpe beto ke zibula bielo na bantu nionso, ya vwanda nani bawu kele, ntinta, dikanda, to credo, beto ke yamba muntu nionso. “Ti muntu nionso ke zola, kwisa.” Mpe kana beno kele ve na dibuundu, beto ke vwanda na kiese samu na beno na kukwisa kaka mpe kubundana na beto. Ya kele ve na kima samu na kukota. Beno kwisa kota kaka ntangu ba me zibula bielo, mpe beno bundana na beto. Yawu yina kaka beno fwana sala; beno kwisa kaka mutindu yina. Beno kwisa na ntima ya kuzibula, beno vwanda na kisika ya beno, mpe beno sadisa beto na kunata Kimfumu ya Nzambi na ntwala. Samu, beto ke kwikila ti ngunga, me kuma pene-pene, ti ntangu bima yina nionso ba zabisaka na kati ya Biblia ke salama.

<sup>21</sup> Kukondwa ntembe ti mingi na kati ya beno me tangaka nsamununu ya Khrushchev, na U.N., kilumbu yankaka yina, mutindu ba zabisaka munu na zulunale ya Canada, na nkundi ya munu. Yandi tubaka, “Kana Nzambi kele, Yandi me kubama diaka na kubengana beno na tempelo, beno ba-capitaliste, mutindu Yandi salaka na mbandukulu.” Na yina beno lenda tanga ntangu yayi na kati-kati ya banzila, “Yandi me kubama diaka na kusukula tempelo.” Mpe ya kele mpasi, na kuwa communiste mosi ke tuba diambu ya mutindu yina? Yandi vwandaka na raison, na kutala. Ya kieleka. Ya vwandaka ba-capitaliste, na mbandukulu, yina pesaka mpasi. Beto kele ba-capitaliste.

<sup>22</sup> Beto me kuwa pasteur ya luzolo, ya lutondo, Mpangi Neville, ke sala nsamunu mosi na télévision . . .to na radio, na suka yankaka yina, mu vwandaka banza yawu kaka ntangu nionso, na mabanza ya munu. Mu lendaka zimbana yawu ve. Mu zabisaka yawu na nkundi ya munu, mazono na nkokila. Mpe tala yina ya tubaka, ti ya ke vwanda. . .Na manima ya kukatula Mpeve-Santu, na ntoto, nsambulu ya dibuundu ya mambu ya nganda ke landila nzila ya yawu, kukondwa kusala luswaswanu. Beno me kuwa yawu ve, beno me. . .Bantu yikwa me kuwaka yawu? Ya vwandaka ya ngudi ve? Ba me zaba ve Mpeve-Santu, na yina ba ke zaba ve wapi ntangu Ya me kwenda, mpe ba ke landila kaka kusala mambu ya bawu mutindu na mumesanu. Ntangu yina ya nsuka mosi ke baka kidimbu na Nzutu ya Klisto, bawu ke landila kaka, na kumeka kunatila Yandi bantu me ndima, samu bawu zaba ve yina Yandi kele. Mpe bansambulu ya bawu ya mambu ya nganda ke landila kaka mutindu ba vwandaka. Ntangu yayi, ya lendaka ve kukota na kati ya beno mutindu ya me kota na munu, kasi yina vwandaka kieleka nsamunu mosi ya ngudi. Ti, ba ke vwanda ya kudinda mingi, na kati ya ba-rite ya nsambulu, tii bawu ke tala ve Mpeve-Santu, samu ba me zaba ve yina Yandi kele, na kubanda.

<sup>23</sup> Nzambi kuwila beto mawa. Mpangi-bakala, mu ke zola zinga na luzingu yayi, mpe nsatu ya munu, kele ti kana Yandi me nionga fioti na kati ya ntima, mu ke zaba yawu na kati ya ntima ya munu. Kana mu me sala kima yina ke niongisa Yandi, mu ke vwanda na kiyeka ya kuzaba yawu kaka na ntangu yina.

<sup>24</sup> Kulutila mingi, kukwenda ya Yandi; mu ke zola ve kuvwanda awa ntangu Yandi kele awa ve. Mu ke zola kwenda na ntangu yina, yinga, tata, samu ya ke vwanda ve na Menga na kiti ya mawa. Ya ke vwanda mudidi mpe ya kifuluka na mulinga mpe ndombe. Kivinga ke vwanda ve na Nzonzi kuna, samu na kuzonzila beto na ntangu yina. Beno zaba ti Masonuku me tuba mutindu yina? Kivinga vwandaka ya kifuluka na mulinga. Ya vwandaka ve na Menga na kiti ya mawa, na yina ya kele lusambusu.

25 Kana Mfumu ke pesa beto, mwa bankokila ya reveil, na ntangu mosi na mbandukulu ya automne, Mu bakaka lukanu na mabanza ya munu, mu ke zola baka Buku yina ya Apocalypse, samu na kulongoka yawu, kulonguka Buku ya Apocalypse, kubanda mbandukulu tii na nsuka.

26 Ntangu yayi, bubu yayi, mu zaba ti bantu mingi me kwisa awa, samu ba sambila samu na bawu. Mpe bureau ya munu vwandaka ya kukanga bubu yayi, to sabala yayi. Mpe bayankaka kwendaka kuna, ba kuzwaka ve ntangu ya kusambila samu na bawu, kuna, samu bampangi vwandaka me kwenda, samu na kupema, na mwa bilumbu fioti. Ba ke na kisalu mingi ya kusala; kisalu ya bawu mosi, mpe kisalu ya tabernacle, mpe balubokilu ya munu na allo-allo mpe nionso yina. Ya ke kotisa beno na kidi-kidi. Mpe ya kele samu na yina. Mu zaba ti mu fwana kwenda kisika mosi kuna, na mwa ntangu fioti, mpe kusala kima mosi ya luswaswanu, mpe mu zaba ti ya ke mutindu mosi samu na bawu, diaka. Na yina, ba me bokila munu. Mu tubaka, “Mu banza ti ya ke vwanda mbote mingi.” Mpe beto ke sambila samu na bambevo, na mwa ntangu fioti.

27 Mpe mu banzaka ti beto ke tanga kima mosi na Ndinga ya Nzambi. Kana beno kele na ba-Biblia ya beno ntangu yayi, beto baka Buku ya Esaie. Mu ke zolaka kumona beno kubaka Biblia ya beno mpe kutanga Yawu. Mu ke tanga . . . Ata ti beno me tanga Ndinga mosi to zole, kasi, Ya kele Ndinga ya Nzambi ya Kukonda nsuka, yina ke Kufwaka ve. Ya ke luta ata fioti ve. Kapu ya 55 ya Esaie, yintu ya dilongi, “Mpulusu ya kukonda nsuka.”

*Beno kwisa, beno nionso kele na mpwila ya masa, beno kwisa na bamasa, mpe ata ti beno kele na mbongo ve; beno kwisa, beno sumba, mpe beno kudia; yinga, beno kwisa, beno sumba vinu . . . miliki kukondwa mbongo mpe kukondwa ntalu.*

*Samu na yinki beno ke bebisa mbongo na kima yina kele dimpa ve? mpe na manima nzala ke simba beno diaka? beno kuwa munu mbote, mpe beno ke kudia yina kele mbote, mpe moyo ya beno ke lekita madia ya kitoko.*

*Beno kuwa munu mbote, mpe beno kwisa na munu: beno kuwa, mpe moyo ya beno ke zinga; mpe mu ke sala ngwisani ya kukonda nsuka na beno, samu na kulandila kaka na kupesa beno mambote nionso mu silaka na David.*

28 Mu ke zola tuba na beno, na mwa ntangu fioti, na zulu ya dilongi: *Kukondwa Mbongo To Kukondwa Ntalu.*

29 Ya kele na bansaka mingi na bilumbu ya beto. Ya ke na bima mingi ke benda bukebi ya bantu yina beto ke bokila “biese,” mpe ya kele samu na bantu nionso, bansungi nionso.

30 Ya kele na bima yina ke vuna bantwenia, makinu ya bilumbu yayi mpe bafeti ya rock-and-roll, mpe musiki nionso yina ke

tambula na yawu. Mpe nionso yayi ke vuna mingi, ya me salama samu na bansaka.

<sup>31</sup> Mu ke kipe ve yinzo ya mbote yina mwana me sansama, mpe wapi mutindu ba me longa yandi na kusala mambu ya mbote; kana mwana yina me ndima ve nzingulu ya Lubutuku ya malu-malu, musiki ya rock-and-roll ke benda bukebi ya yandi na mbala mosi yandi ke kuwa yawu. Samu, ya kele na kati ya yandi, kubanda lubutuku, na nkadulu, mpeve ya kimuntu. Mpe ngolo ya diabulu kele nene mingi, bubu yayi, tii ya ke simba mpeve ya mwana yina ya fioti.

<sup>32</sup> Mpe wapi mutindu ya ke sala kulutila mingi na bantu ya kukula, kuna, ti yandi me losa Lubutuku ya malu-malu! Samu, ya ke lomba kaka ti luzingu ya beno kusoba, mpe beno kubalula ntima mpe beno butuka ya malu-malu, na kati ya Kimfumu ya Nzambi, nkadulu ya beno ke vwanda samu na bima ya yinza, ata ti beno kele muntu ya nsambulu, kaka kana nkadulu yina me soba na kati ya beno. Beno lendaka sambila mpe kuvwanda muntu ya nsambulu, kasi yina ke vwanda kaka na ngolo ya kubenda beno, samu muntu yayi ya ntama ya disumu mpe bansatu ya yandi me kufwa ntete ve na kati ya beno.

<sup>33</sup> Kasi ntangu beno ke bika Klisto kumata na kiti ya kimfumu ya ntima ya beno, bima yina ke yangisa beno diaka ve. Ya kele nene mingi.

<sup>34</sup> Mu lendaka ve kutanga nkumbu ya bakala yango, samu mu ke banza ve nkumbu ya yandi ntangu yayi, kasi mingi na kati ya beno ke bambuka moyo na yandi. Ba me tuba ti ya vwandaka na kisanga mosi yina bantu vwandaka kwenda, na kubumbama, mpe bakento vwandaka basika, ke yimbila. Mpe bankunga ya bawu vwandaka benda mingi, ti ba-marin yina vwandaka luta, na bamasuwa, vwandaka kota kuna. Na manima basoda yayi vwandaka basika na kisika ya kubumbama mpe ke—ke kanga ba-marin yayi kukondwa ngolo, mpe vwandaka kufwa bawu. Mpe bakala mosi ya nene zolaka kuluta kuna. Mpe yandi lombaka na ba-marin ya yandi na kukanga yandi na dikunzi ya masuwa, mpe—mpe—mpe kutula yandi kima mosi na yinwa ya yandi, samu ti yandi lendaka ve kuboka; mpe—mpe ya tumaka ti ba tula mifiniku na makutu ya ba-marin, na mutindu ti ba lendaka ve kuwa bankunga yina, mpe na bankunga yina, ba bendama samu na kuwa yawu. Mpe bakento basikaka, ke kina mpe—mpe ke boka, mpe ke yimbila, mpe, oh, ya vwandaka kitoko mingi, tii yandi kululaka binkoso ya yandi, na kubokila ba-marin ya yandi, “Beni kanga masuwa! Beni kanga masuwa!” Kasi ba lendaka kuwa yandi ve, ba vwandaka na mifiniku na makutu ya bawu.

<sup>35</sup> Na manima yandi nataka masuwa tii na kisika yina ya lombaka ti ba kangula yandi na dikunzi ya masuwa, to, kukangula yandi bansinga na maboko, mpe yandi katulaka

bawu mifiniku na makutu. Kuna, ntangu yandi vwandaka tambula na babala-bala yandi kuwaka musicien mosi ke yimba kima yina vwandaka kitoko mingi kulutila yina kuna, ti ntangu yandi vwandaka luta diaka kuna pene ya kisanga, bawu tubaka, “Oh, munati-masuwa ya nene, beto ke kanga nge diaka na dikunzi ya masuwa?”

<sup>36</sup> Yandi tubaka, “Ve, beno bika munu na kimpwanza. Mu me kuwa kima yina kele kitoko mingi, ti bankunga yayi ke sala diaka kima ve na zulu ya munu.”

<sup>37</sup> Ya ke mutindu yina na Muklisto yina me butuka mbala ya zole. Ba me kuzwa kima yina kele nene mingi kulutila rock-and-roll mpe bansaka ya yinza yayi. Ba me bendama na Mpeve-Santu. Ya kele nene mingi, tii yinza me kufwa samu na bawu.

<sup>38</sup> Kasi ntangu beno ke kwenda na bansaka yayi ya mpamba-mpamba, beno fwana bambuka moyo ti beno fwana kunata mbongo mingi. Mpangi mosi ya ntwenia yina ke nata nkundi ya yandi ya kento na bafeti yayi mpe na makinu yayi, mpe nionso yina, ke futa mbongo mingi ya lufutu ya yandi ya sabala. Mpe bambuta yina ke meka na kuzwa biese na kukwendaka na banganda, samu na kuzimbana mawa ya bawu ya sabala na nzila ya malafu, ba ke futa mbongo mingi. Mpe yinki ba ke kuzwa na yawu? Ba ke kuzwa kima mosi ve kasi mpasi.

<sup>39</sup> Mpe beno bambuka moyo, kilumbu mosi beno ke pesa mvutu na Nzambi samu na yawu. “Mpe lufutu ya disumu kele lufwa.” Beno ke sala kima mosi ve awa na zulu ya ntoto, na yawu. Ya kele kutalana ya luvunu. Kunwa malafu ke bwela kaka kiadi. Disumu ke bwela kaka lufwa na zulu ya lufwa. Sheke ya beno ya nsuka ke vwanda kukabwana na Nzambi, Kukonda nsuka; na kati ya Dizanga ya Tiya. Mpe beno ke kuzwa ndandu mosi ve, kasi beno ke zimbisa yawu.

<sup>40</sup> Na yina Nzambi ke kwisa mpe ke yufula kiuvu yayi, “Samu na yinki beno me bebisa mbongo samu na bima yina ke katulaka nsatu ve? Samu na yinki beno ke sala yawu?”

<sup>41</sup> Yinki ke sala ti muntu kusala mutindu yina? Ba ke bebisa nionso yina ba ke na yawu, mpe nionso yina ba lendaka kuzwa, samu na kusumba malafu, samu na kulwatisa kento mosi ba ke basika na yandi, to mwa biese ya yinza, ya kubeba.

<sup>42</sup> Kasi ba me tuba na beto na kati ya Biblia, mpe ba me bokila beto na kukwisa na Nzambi, “Mpe samu na kusumba kiesa ya Kukonda nsuka mpe Luzingu ya Kukonda nsuka, kukondwa mbongo to kukondwa ntalu.”

<sup>43</sup> Bima yina lendaka ve kukatula nsatu, mpe nsuka ya yawu kele lufwa ya Kukonda nsuka. Mpe ya ke lomba beno mbongo nionso yina beno lenda kukutika, samu na kuvwanda bonnet ya nene to muntu ya bansaka, to animateur ya lukumu, to nionso yina beno lendaka vwanda, to mwana-kento ya lukumu, to nionso yina ya kele. Ya ke lomba beno nionso yina beno lendaka



kukutika, samu na kusala yawu. Kulwata bilele ya mutindu ya zulu mingi, mpe—mpe kusala bima yina yinza ke salaka, nionso yayi samu na kuzwa sheke ya lufundusu ya Kukonda nsuka.

44 Nzambi tubaka, kuna, “Samu na yinki?” Yinki beto ke sala na Kilumbu ya Lusambusu, ntangu ba ke yufula beto, samu na yinki beto salaka mutindu yina? Yinki ke vwanda mvutu ya beto? Yinki ke vwanda mvutu ya Amérique ya bilumbu yayi, yina ke tuba ti ba kele yinsi ya Baklisto? Mpe ya ke na mbongo mingi ba ke bebisa na wiski, na mvula mosi, kulutila samu na madia. “Samu na yinki beno ke bebisa mbongo samu na bima ya mutindu yina?” Kasi, luyalu lendaka fidisa beno na boloko, samu na ba-dollar tanu ya mpaku beno me fidisa ntangu yankaka na kisika yina me lunga ve na kubaka bampaku yina, samu na kufidisa ba-missionaire na bayinsi ya nzenza. Ba ke yufula beto kilumbu mosi, “Samu na yinki beno salaka mutindu yina?”

45 Beto kele yinsi ya Baklisto, mpe ba me fidisa bamakiasa na bantu yina kuna, samu na kusumba kimpangi ya bawu. Ntangu yayi ba ke na kumanga yawu. Kuyituka ve ti Khrushchev tubaka, “Kana Nzambi kele, Yandi ke sukula diaka yinzo ya Yandi.” Mimpani lendaka sala bansamunu ya mutindu yina, samu na kunata nsoni na zulu ya beto. Wapi diambu ya kiadi ya kele! Mpe beto ke kukibokila beto mosi Baklisto.

46 Nzambi tubaka, “Beno kwisa, beno sumba Luzingu ya Kukonda nsuka, kukondwa mbongo, kukondwa ntalu.” Luzingu, samu na kuzinga kukonda nsuka, mpe beto ke pesa Yawu mukongo mpe beto ke seka Yawu. Yinki beto ke sala Kilumbu yina? Yinki ya ke vwanda . . . ?

47 Kana Nzambi me pesa beto bima ya kusala, mpe me pesa beto mbongo, mpe me sala beto yinsi ya mvwama mingi na nsi ya mazulu, na yina Nzambi ke yufula, yina beto me sala na yawu. Samu na yinki beto ke bebisa mbongo ya beto na bima yina ke katulaka nsatu ve? Ya kele ve kaka samu na yinsi, kasi ya ke vwanda samu na konso muntu; kubanda na ba-centime, tii na ba-million yina beto kuzwaka, beto nionso ke pesa mvutu.

48 Ntangu bantu ke kufwasana: mu tangaka zulunale mosi ntama mingi ve, kisika bana-babakala zole vwandaka sala na terrain ya camping. Mosi vwandaka na bana tanu, yina yankaka vwandaka na bana zole. Mpe ba zolaka kukatula mosi ya bawu na kusalu. Mpe mosi ya babakala yina vwandaka na bana zole, to yina vwandaka na bana tanu, monaka ti yandi vwandaka na nsatu mingi ya kusalu kulutila mosi yina vwandaka na bana zole; mpe yandi kwendaka kuzomba na yandi, mpe yandi bulaka yandi munduki na mukongo.

49 Mbongo, yawu yina mutindu ya yinsi, yawu yina mutindu ya nsatu, yawu yina mutindu ya mpeve yina ke twadisa bantu.

50 Na manima beno ke mona wapi mutindu Lubutuku ya malu-malu kele kaka mfunu. “Beno fwana butuka mbala ya zole.” Ya

fwana vwanda mutindu yina. “Beno kwisa na Munu, mpe beno sumba kukondwa mbongo.”

<sup>51</sup> Beno lendaka ve kutuba, “Mu vwandaka na mbongo ve.” Beno kele na nsatu ya mbongo ve. Ya kele ya kupesa ya mpamba.

<sup>52</sup> Beto ba-Américain me bendama na kusumba nionso. Yawu yina slogan ya beto. “Beto ke sumba nionso. Beto kele na mbongo.” Beto ke talisa ba-dollar ya beto na bayinsi yankaka, mpe nionso yina, yina kele bamputu. Beto ke kwenda kuna, beto ke mona bizieti, na bima yayi nionso ke benda meso. Ba-Américain ke sala nionso yina ba me zola. Na meso ya Nzambi bima yina nionso kele bandandu ya mvindu. Yina ke sumba ve kisika na Mazulu samu beto. Kasi bima nionso na Amerique, beto fwana kufuta mbongo samu na kuzwa yawu.

<sup>53</sup> Beno ke kwenda na restaurant, mpe beno ke kudia madia ya beno ya midi. Mpe kana beno tula ve mbongo na zulu ya mesa, samu na kusomuna kisadi yina ya kento, yandi ke kanga kizizi ya yandi, kasi ba ke futaka yandi na kompani yina yandi ke salaka. Mpe na yina beno ke sala mbote ti kusomuna yina kuvwanda pene ya kumi na zulu ya nkama, to kulutila, facture ya beno. Kana beno sala mutindu yina ve, kisadi yina ya kento ke baka beno mutindu muntu yina ke kabaka ve to mutindu muyimi. Kasi, yandi kele na lufutu. Mu banza ya kele nsoni mpe mawa, na kusala mutindu yina. Mu banza ti ya ke pesa nsoni na yinsi. Na ntangu ya ntama, bantu ya mbote, ba-restaurant ya mbote, vwandaka pesa muswa na yawu ve. Kasi mpeve yina me banda na kuyala muntu nionso.

<sup>54</sup> Mu vwandaka sala nzietolo, na train. Mpe porteur mosi . . . Mu vwandaka na mwa sanduku na diboko mosi, valise na diboko yina yankaka, mpe mwa trousse ya munu samu na kuzenga bansuki na nsi ya dipeka, mpe mu vwandaka tambula. Porteur kwisaka kuna, yandi tubaka, “Mu lenda sadisa nge na kunata yawu?”

<sup>55</sup> Mu tubaka, “Oh, mu ke kwenda kaka kuna na train, tata. Matondo na nge, matondo mingi.” Kaka pene, oh, ya ba-mètre makumi tatu.

<sup>56</sup> Yandi tubaka, “Mu ke sala yawu,” mpe yandi bakaka mwa kizitu ya fioti mpe zangulaka yawu, yandi bandaka na kutambula.

<sup>57</sup> Mbote, ntangu yandi kumaka kuna, mu banzaka ti mu . . . Mu zaba ti ba ke futaka yandi samu na yawu, kasi mu ke pesa yandi—ke pesa yandi kaka ndambu ya dollar mosi. Yandi nataka kaka, bizitu ya munu, pene, beto tuba, muniti mosi; katuwa awa tii na nsuka ya tabernacle yayi, kisika yandi kumaka na train. Mu kotaka na train, ya ntete, mpe mu niekaka samu na kubaka bifunda ya munu. Mu pesaka yandi ndambu ya dollar mosi.

Yandi tubaka, “Vingila fioti!”

Mu tubaka, “Yinki diambu, tata?”

Yandi tubaka, “Mu me nata bifunda tatu samu na nge!”

Mu tubaka, “Yinga, tata, ya kieleka. Yinki, yinki diambu?”

<sup>58</sup> Yandi tubaka, “Ntalu ya lufutu ya munu ke vwandaka kaka ba-centime makumi zole na tanu na kifunda mosi. Nge fwana bwela na munu ba-centime makumi zole na tanu yankaka.”

Beno me mona, yawu yina ki-Amerika, beno fwana kusumba bima nionso.

<sup>59</sup> Beno ke nata tomabilu ya beno mpe beno kubwa na dibulu, mpe beno ke bokila muntu mosi samu na kubasisa beno kuna. Beno ke sala keba na kukubama samu na kufuta mbongo, samu ba ke pesa beno ntalu samu na yawu. Kana tomabilu mosi me kwisa samu na kubenda beno, ba ke pesa beno facture *kingandi* na kilomètre mosi. Mpe kana fermier mosi, me basisa tracteur ya yandi, ya ke vwanda bambala yivwa na zulu ya kumi kulutila yina.

<sup>60</sup> Beno fwana futa samu na nionso yina beno me sala. Bima nionso kele “Beno futa! Mbongo! Beno futa! Mbongo!”

<sup>61</sup> Mpe wapi mutindu dibulu yina disumu losaka beno kele mudindu mingi! Nani lendaka basisa beno na dibulu ya disumu? Kasi Nzambi me basisa beno na dibulu ya disumu, kukondwa mbongo, kukondwa ntalu, ntangu muntu mosi ve lendaka basisa beno kuna.

<sup>62</sup> Kana beno futa mbongo mingi ve samu na tomabilu yina ke bendaka kubenda beno, beno ke bikala na kati ya dibulu. Beno fwana vwanda na mbongo to beno ke bikala na kati ya dibulu.

<sup>63</sup> Kasi dibulu ya kulutila yimbi yina beno vwandaka, kele yina diabulu losaka beno, dibulu ya disumu mpe kukondwa lukwikilu. Nzambi ke basisa beno kuna ya mpamba, kukondwa mbongo, kukondwa kufuta. Mpe kasi beno ke bikala ya kutandama na kati ya dibulu, na kubalukaka na disumu, mpe beno ke bokila Yandi ve.

<sup>64</sup> Ntangu tomabilu ke basisa beno kuna, mbala mingi ba ke tulaka muniololo ya nene na kati ya dibulu, ba ke kanga yawu na pare-chocs to nionso yina, mpe ba ke banda na kubenda. Mpe ngolo ya tomabilu ke banda na kubenda, mpe ba-moteur ke banda na kusala, mpe ke basisa beno kuna.

<sup>65</sup> Ntangu Nzambi ke mona beno na kati ya dibulu ya disumu, mpe ke kuwa beno ke bokila Yandi, Yandi ke fidisa muniololo yina ba kangaka na Calvaire, zola ya Nzambi, mpe ke kanga yawu na ntima ya beno, mpe ke tula Ngolo ya Mpeve-Santu kuna, ke banda na kubenda. Mpe ya ke lomba kima mosi ve. Mpe kasi beto ke vwanda na kati ya dibulu samu beto lenda ve kusumba yawu na bapokosi ya beto. Beto ba-Américain ke banza ti beto lenda sumba yawu na bapokosi ya beto, kasi beno lenda sala yawu ve. Ya kele kukondwa mbongo, to kukondwa ntalu.

Beno ke sumba yawu ve na dibuundu. Yesu sumbaka yawu na Calvaire. Kasi bantu kele na nsoni ya Yawu. Ba ke zola Yawu kuvwanda na mutindu ya bawu. Nzambi me sala nzila mosi samu beno kundima Yawu, mpe Ya kele ya mpamba kana beno ke ndima Yawu.

<sup>66</sup> Na bantangu mingi, ntangu ba ke basisa beno na dibulu, beno ke fuluka na minkwalu-nkwalu, beno fwana kwenda, na lupitalu. Mpe ntete ba banda na kusimba beno, ntete kima mosi kusalama, ba ke yufula, “Nani ke futa facture? Kana beto ke tunga bamputa, kana beto ke mwangisa mafuta kuna, mpe ke tobola beno mwa—mwa bantunga samu na kunwanisa mikolobo ya menga, wapi mutindu ya assurance beno kele na yawu?” Ntete ba sala kima mosi, ba ke zola zaba kana mbongo kele.

<sup>67</sup> Kasi ntangu Mfumu ya beto ke tula muniololo ya Yandi ya zola na ntima ya beno, mpe ke benda beno na dibulu ya disumu, Yandi ke belula ntima nionso kele na mpasi, ke katula disumu nionso. Mpe ba ke losa facture na mubu ya nzimbani, samu na kubambuka yawu diaka ve na zulu ya beno. “Beno kwisa, kukondwa mbongo to kukondwa ntalu.” Ata ti bamputa ya beno kele yimbi mingi, wapi mutindu bamputa ya beno kele nene mingi, yina dibuta ya beno me sala, to yina beno me sala, ya ke na facture ve samu na yawu. Yandi ke belula bampasi ya beno, ke katula mawa ya beno. “Yandi lwalaka samu na bayimbi ya beto, lwalaka samu na disumu ya beto ya nkú; kitumbu ya ngemba ya beto kubwaka na zulu ya Yandi; mpe na bamputa ya Yandi beto me beluka.” Nionso kele ya mpamba.

<sup>68</sup> Mpe beto ke zola ve kundima Yawu, ya kele samu beto me twadisama na mpeve ya yimbi. Beto me twadisama na mpeve ya yinsi, mpeve ya yinza, na kisika ya kutwadisama na Mpeve ya Nzambi, Mpeve-Santu, yina ke twadisa beto mpe ke nata beto na Kieleka nionso, mpe ke siamisa Biblia.

<sup>69</sup> Mwa ntangu fioti me luta, mu vwandaka solula na muntu mosi ya kukondwa lukwikilu. Yandi tubaka, “Beno banza na yawu, Tata Branham. Na ntwala ya bampasi yayi nionso ya luzingu, mpe kima mosi kaka beto kele na yawu, yina ke tuba na beto ti beto me kuzwa mpulusu, kele mwa masonama ya ba-Juif.”

<sup>70</sup> “Oh,” mu tubaka, “tata, yina lendaka vwanda nionso yina nge kele na yawu, kasi mu ke na kima mosi ya kulutila yina. Mu kele na Mpeve ya Muntu yina sonikaka Yawu, yina ke siamisaka Yawu mpe ke salaka ti Yawu vwanda mutindu yina, ya ke lungisa konso nsilulu.” Yandi zabaka ve yinki kutuba.

<sup>71</sup> Beno me mona, beno fwana kukwisa mpe kusumba kukondwa mbongo, kusumba kukondwa ntalu. Ya ke lomba kima mosi ve. Ya kele ya mpamba samu na “yina nionso me zola, yandi kwisa.” Nzambi ke basisa beno na dibulu.

<sup>72</sup> Mutindu bakala yina na mwelo yina ba bokilaka Belle. Kubanda kivumu ya mama ya yandi, diabulu losaka yandi na kati ya dibulu, na kusalaka yandi kikata. Mutindu ya yandi ya kuzwa madia vwandaka kulomba makabu na bantu yina vwandaka luta. Mpe mutindu yandi vwandaka na mwelo na suka yina, yandi monaka balongi zole ya ba-pentecotiste ke kwisa. Ba vwandaka ve na mwa ba-centime kumi, na yina yandi tubaka, “Palata mu ke na yawu ve.” Mpe ba-centime kumi kele kitini ya fioti ya palata. “Palata mpe wolo mu ke na yawu ve.”

<sup>73</sup> Mu banza ti bakala yango banzaka kima mosi mutindu yayi. “Ya kele na mfunu ve ya kubasisa bolu ya munu.” ya lendaka vwanza ti yandi vwandaka meka na kubumba mbongo mingi. Yandi vwandaka na bamvula makumi yiya, mpe ya lendaka vwanza ti yandi vwandaka meka na kubumba mbongo mingi, samu ti baminganga kusadila yandi ba-appareil orthopédique zole, samu na kutambudila, na yina, yandi, ya vwandaka ya kulemba na binkoso ya yandi. Mpe ntangu yankaka yandi zolaka talisa na baminganga, ti yandi vwandaka na mbongo ya kulunga, samu bawu kutala mbote diambu ya yandi. Mpe ya kieleka ya vwandaka ve na nsatu samu na yandi na kutalisa bolu ya yandi na balongi yayi ya ba-pentecotiste yina vwandaka na kima mosi ve. Bweso, bawu . . . vwandaka mawa mingi, na kuzwa ba-centime ya mbongo na bantu yayi.

<sup>74</sup> Kasi ntangu yandi talaka bawu na kizizi! Mosi, ntwenia mpe na kizizi ke sema na buntwenia; yankaka yina, kiboba mpe na mifutu; mutindu Jean . . . mutindu Pierre na Jean vwandaka mata kuna na mwelo. Yandi monaka kima mosi na bakala yina ya ntwenia. Ya zole tuba, lusé ya yandi vwandaka sema fioti mingi kulutila na mumesanu. Yandi monaka na nsi ya mifutu mpe mawa yina vwandaka na zulu ya kizizi ya mulobi yayi ya kiboba, kizizi ya kuzika na mwini ya Galilée, yandi monaka “kiese yina ba lendaka zonzila ve, mpe nkembo ya kifuluka.” Yandi monaka kima yina monanaka fioti ya luswaswanu.

<sup>75</sup> Beno zaba, ya kele na kima mosi samu na Buklisto, yina ke sala ti nkadulu ya bantu kusoba. Ba kele bantu ya kitoko mingi na yinza ya muvimba.

Mpe yandi bakaka bolu ya yandi mpe yandi bumbaka yawu.

<sup>76</sup> Mpe ntumwa Pierre, yina vwandaka kiboba, tubaka, “Palata mpe wolo mu ke na yawu ve.” Na nzonzolo yankaka, “Mu lenda ve kusadisa nge ata fioti, na kusumba ba-béquille. Palata mpe wolo mu ke na yawu ve, kasi yina mu ke na yawu!” Yandi kwendaka sumba na Yandi yina kele na mafuta ya niosi mpe bakiese yina ke pesaka vinu ya mpulusu. Ya lutaka bilumbu zole to tatu, yandi basikaka, na Pentecote, kisika kima mosi salamaka.

<sup>77</sup> Mpe bakala ya ntwenia ndimaka yawu na “amen” ya nene, mpe yandi talaka yandi na kizizi.

<sup>78</sup> Yinki salamaka? Muniololo yina ya kimpangi, ya mawa ya Yandi yina tubaka, “Mu vwandaka na mawa na ntima samu na bambevo,” Mpeve yina mosi kotaka na ntima ya mulobi yina ya kiboba. Yandi tubaka, “Mbongo, mu ke na yawu ve, kasi mu ke na kima yina me luta yawu bambala ba-million. Yina mu ke na yawu!”

<sup>79</sup> Ntangu yayi beno bambuka moyo, Pierre vwandaka Juif, mpe bawu ke zolaka mbongo, na mumesanu, kasi Juif yayi balulaka ntima. Ya kele ve, “Yina mu ke na yawu, mu ke tekisa yawu na nge.”

<sup>80</sup> Kasi, “Yina mu ke na yawu, mu ke pesa yawu na nge! Yina mu ke na yawu! Mu ke na centime ve na pokosi ya munu. Mu zolaka ve kusumba ata kitini ya dimpa. Mu lendaka ve kusumba kima mosi. Mu ke na centime mosi ve. Kasi kana nge lendaka ndima yawu, yina mu ke na yawu, mu ke pesa yawu na nge samu ba pesaka munu yawu.” Yawu yina beto kele na yawu nsatu. “Yina mu ke na yawu, mu ke pesa yawu na nge.”

“Yinki nge ke na yawu, tata?”

<sup>81</sup> “Mu me kutana na Yandi yina ke tekaka miliki mpe mafuta ya niosi, kukondwa ntalu. Mu ke pesa Yawu na nge. Nge ke pesa munu kima mosi ve samu na Yawu. Kana nge ke ndima Yawu, mu ke pesa Yawu na nge. Ya kele ve mutindu bantu yina ke tekisaka, kasi mutindu bantu yina ke pesaka.”

<sup>82</sup> Samu, “Mutindu beno me kuzwa yawu ya mpamba, beno pesa yawu ya mpamba.” Ya vwandaka lutumu ya Mfumu ya yandi, kaka bilumbu tatu na ntwala. “Beni kwenda na yinza ya muvimba, beno longi Nsangu ya mbote. Yandi yina ke kwikila mpe ke baka mbotika ke kuzwa mpulusu; mpe yandi yina ke kwikila ve ke fundisama. Bidimbu yayi ke landa bayina ke kwikila: Na Nkumbu ya Munu ba ke basisa bampeve ya yimbi; ba ke tuba bandinga ya malu-malu; kana bawu kunwa manganga ya yimbi, ya ke sala bawu yimbi ve; kana bawu simba banioka, ya ke sala bawu yimbi ve. Mutindu beno me kuzwa yawu ya mpamba, beno pesa yawu ya mpamba.” Juif yina vwandaka me soba.

<sup>83</sup> Yina beto kele na yawu nsatu na Amérique kele nsobolo, ya Mpeve-Santu samu na kubaka kisika ya mikembo ya bansambulu. “Mutindu beno me kuzwa yawu ya mpamba, beno pesa yawu ya mpamba.”

<sup>84</sup> “Yina mu ke na yawu, mu ke pesa yawu na nge: Ma Nkumbu ya Yesu Klisto ya Nazareth, telama mpe tambula”; lukwikilu na Nkumbu yina ya santu ya Mvangi! Kuyituka ve yandi bandaka na kusote mpe bandaka na kudumuka na zulu, mpe ke kumisa Nzambi!

<sup>85</sup> Oh, beno zaba yina ke sala yawu ya nkembo, yandi vwandaka kuna bamvula makumi yiya, yandi vwandaka meka na kuzwa mbongo mingi samu na kusumba ba-béquille, kasi yandi lendaka ve kusala yawu. Kasi kuna na kisika yina yandi vwandaka

vingila ve, mpe na ntangu yina yandi vwandaka vingila ve, mpe na bantu yina ya vwandaka vingila kima mosi ve, bantu ya kukondwa kulunga, yandi kuzwaka yina yandi vwandaka zola. Mu ke na kiese mingi ti Nzambi ke salaka yawu mutindu yina.

<sup>86</sup> Mpe na nkokila mosi, na kati ya nkonga ya fioti ya bantu yina ba vwandaka bokila ba-exalté, mu kuzwaka yina mu zolaka, yina mbongo lendaka ve kusumba. Na kati ya nkonga ya bantu yina me longukaka ve, ya kukondwa mayele, yina me lwata bilele ya bamputu, Bantu-ndombe, na kubanda, kuna na ntoto ya nganda ya ntama, ya kusoba, mu kuzwaka ntalu mosi, diyaka; ntangu bakala yina ya ndombe ya kiboba talaka munu na kizizi, mpe tubaka, “Nge me kuzwaka Mpeve-Santu kubanda nge me kwikilaka?” Oh, Ya vwandaka kima yina mu vwandaka zola. Mu vwandaka vingila ve kuzwa Yawu na kati ya bantu yina, kasi bawu vwandaka na yina mu vwandaka na yawu nsatu.

<sup>87</sup> U.N. bubu yayi, ba lendaka ve kundima yina beto kele na yawu, kasi yawu yina ba ke na yawu nsatu. Khrushchev, bayankaka nionso, kele na nsatu ya Klisto, na mbotika ya Mpeve-Santu. Ya ke soba bankadulu ya bawu. Ya ke sala ti, babakala yina ba ke yinaka, kukuma bampangi. Ya ke katula bwimi, mpe nsoki mpe kuswana; mpe ya ke tula zola mpe kiese, mpe ngemba, mambote mpe mawa.

<sup>88</sup> Yinga, na bisika yina beno vingila kima ve, bantangu yankaka kisika yina beno ke kuzwa yina beno ke sosa.

<sup>89</sup> Yinki zolaka pesa bana ya Israel (ba vwandaka na ba-butin nionso ya Egypte) ntangu bikoba ya bawu vwandaka basisa menga, ntangu ludimi ya bawu vwandaka tekita na yinwa ya bawu? Ba zolaka pesa wolo yina nionso ba botulaka na ba-Egyptien, samu na kusobisa yawu na mwa dikopa ya masa. Bantwadisi ya bawu ya ntoto ya kuyuma vwandaka twadisa bawu na owazise mosi na yankaka, katuka na mabulu na bayinto, kasi nionso vwandaka ya kuyuma.

<sup>90</sup> Na yina ya kumaka, kukondwa mbongo to kukondwa ntalu! Ndinga zonzaka na profete mpe tubaka, “Tuba na ditadi,” kima ya kuyuma na kati ya ntoto ya kuyuma, kima yina kele ntama mingi na kuzwa masa. Kuna mpwila ya bawu manaka, kukondwa mbongo to kukondwa ntalu. “Tuba na Ditadi.” Ya kele ve sumba ditadi, kasi “tuba na ditadi.”

<sup>91</sup> Yandi kele kaka Ditadi na nkokila yayi. Yandi kele Ditadi na kati ya ntoto ya kuyuma. Kana beno ke sala nzietolo na ntoto yina ya kuyuma, beno tuba na Ditadi. Beno fwana futa Yandi mbongo ve; beno tuba na Yandi. Mpe Yandi kele lusalusu yina ke kondwaka ve na ntangu ya mpasi. Kana beno kele mbevo, beno tuba na Ditadi. Kana beno kele mbevo samu na disumu, beno tuba na Ditadi. Kana beno kele ya kulemba, beno tuba na Ditadi.

<sup>92</sup> Beno me mona, ya monanaka ti ya zolaka vwanda konso kisika yina. . . Ya monanaka mutindu, kana ya vwandaka ve na

mwa ditonzi ya masa na mwa bisika yina vwandaka bayinto ya masa, ya zolaka vwanda ve na masa kuna na zulu ya mungo, pene-pene ya ditadi. Nzambi ke salaka bima yina me swaswana na yina muntu ke banzaka. Ditadi, kisika ya kulutula kuyuma na kati ya ntoto ya kuyuma, kasi Yandi tubaka, “Tuba na Ditadi.”

<sup>93</sup> Bubuyayi, bantu me vunama mingi. Ba ke banza ti ba lendaka kwenda kutanga bisambu ya bawu, kufuta mbongo na nganga-Nzambi samu na kusala mwa bisambu samu na bawu, kusumba nionso na mbongo. Kana ba ke tunga yinzo-Nzambi ya nene kisika mosi kuna, mpe bakala mosi ya mvwama ke simbisa yawu, ke landila na kuzinga na kuyuma na kati ya ntima, ke lomba na muntu mosi na kusambila samu na yandi, yandi ke banza ti ya me lunga. Nzambi ke zolaka ve mbongo ya beno ya mvindu. Nionso yina Yandi ke zola kele luzolo ya beno mpe luzingu ya beno samu na kutuba na Yandi. Nzambi me pesa beno mbongo, beno bebisa yawu ve samu na bima yina ke katulaka nsatu ve. Beno sadila yawu samu na bima yina ke katulaka nsatu. Kasi samu na kiese ya kieleka, beno lenda ve kuzwa yawu tii beno ke tuba na Ditadi.

<sup>94</sup> Yandi basisaka bamasa yina ke pesaka luzingu, kukondwa mbongo to kukondwa ntalu. Mpe bawu kunwaka masa, mpe ba pesaka masa na bakamela, mpe bana ya bawu kunwaka masa, mpe yinto yayi ya masa ke basisa kaka masa na ntoto ya kuyuma.

<sup>95</sup> Mpe na yina Yandi kele Ditadi bubuyayi, na ntoto yayi ya kuyuma, samu na bantu yina ke na kufwa. “Yandi yina ke kwikila na Yandi ke kufwa ve, kasi yandi kele na Luzingu ya Kukonda nsuka.”

<sup>96</sup> Beno tala. Konso nkokila, ba lendaka ve kuyufula kana ba ke kuzwa dimpa. Ba vwandaka natila bawu dimpa, konso nkokila, ya malu-malu.

<sup>97</sup> Bubuyayi beto ke kwenda kusumba kitini ya dimpa. Kana beno kele mulombi ya mbongo, mpe beno kwenda kuna na magazini, mpe beno tuba, “Mu ke na nsatu ya kitini ya dimpa.”

<sup>98</sup> Yandi ke tuba, “Talisa na munu, ntete, ba-centime makumi zole na tanu. Nge fwana pesa munu ba-centime makumi tanu samu na kitini yayi ya dimpa.”

<sup>99</sup> Mpe ntangu beno ke kuzwa dimpa yayi yinki beno ke vwanda na yawu kuna? Awa ba ke tengama fioti, kasi beno kele kaka na mwa madia fioti yina blé lendaka pesa. Ba ke basisa vitamine nionso na yawu, nsenga nionso, mpe ba ke pesa yawu na bangulu. Ba ke vukisa kinkuku ya poto-poto samu na kuvukisa nsenga yina, mpe ba ke yungula yawu, mpe ba ke sala kitini ya dimpa, bantangu mingi, na maboko ya mvindu, ya kukondwa busantu. Beno me mona yina beno ke mona na kati ya dimpa ya beno, ntangu yankaka, bitini ya bansuki, mpe bima ya mvindu, mpe bitini ya ba-embalage, mpe bima yankaka nionso ke kubwa na bayinzo ya mampa yina. Ba kele bantu ya masumu yina kele na



bimbevo ya kindumba, mpe nionso yina, ke vukisa yawu. Kana beno lendaka mona mutindu yawu me salama, beno lendaka ve kudia yawu. Mpe, kasi, beno ke futa ba-centime ya beno makumi zole na tanu to beno ke kuzwa yawu ve.

<sup>100</sup> Mpe Nzambi vwandaka kudisa bawu konso nkokila, na dimpa yina me salama na maboko ya Bawanzio; kukondwa mbongo, kukondwa ntalu. Mpe bubu yayi, dimpa yina vwandaka talisa Klisto, Luzingu ya kimpeve, yina kulumukaka na Zulu, samu na kupesa Luzingu ya Yandi.

<sup>101</sup> Mpe Nzambi ke pesaka bana ya Yandi, konso kilumbu, nzingulu ya malu-malu. Beno bambuka moyo, kana ba me bumba dimpa yina tii mbasi, ya vwandaka kota mikolobo.

<sup>102</sup> Beno ke kuwa muntu mosi ke tuba, “Mbote, mu kele na . . . Mu ke tuba na nge. Mu kele Luthérien. Mu kele Presbytérien, Baptiste. Mu kele Pentecotiste,” yina kele kaka mwa kitini ya dimpa ya ntama me salama na maboko ya bantu. Nionso yawu yina kaka, ya kele ya mvindu, mpe yina me salama na maboko ya bantu.

<sup>103</sup> Kasi ntangu beno ke kuwa ke kuwa nzingulu ya kimbangi, ya malu-malu, “Na suka yayi, na bisambu, Mpeve-Santu me botika diaka moyo ya munu,” oh, mpangi-bakala, yina kele Madia ya Bawanzio. Yandi ke pesaka bawu madia ya malu-malu, yina me katuka na Zulu, konso kilumbu.

Beto kele na nsatu ya bamvula ya  
masakumunu;

Matonzi ya lemvo ke kubwa na zulu ya beto,

Kasi beto ke lombamba bamvula yayi.

<sup>104</sup> Oh, yinga, fidisa yawu na Zulu, ya malu-malu, Mfumu, Klisto Dimpa ya Luzingu. Tulula Yawu na ntima ya munu, mpe bika ti mu sepela na Mvwandulu ya Yandi ya nene.

<sup>105</sup> Ya kieleka, ba vutulaka matondo. Ba vwandaka vutula matondo. Mpe bakala mosi to kento yina me butuka na Mpeve ya Nzambi, mpe me kuzwa Mpeve-Santu, yandi ke vutula matondo ntangu nionso. Ata nionso yina ke salama, beno ke vutula matondo.

<sup>106</sup> Mutindu mwana-bakala yina ya fioti ya mpofu, yina butukaka kuna na bamongo, Benny ya fioti. Ya bangonda nana, ba-cataracte bandaka na kumata na meso ya yandi. Bibuti ya yandi vwandaka bamputu. Ba vwandaka zinga na lweka ya mongo ya poto-poto. Mpe ba zabaka ti lipaso lendaka sadisa meso ya Benny ya fioti, samu yandi kumona. Yandi vwandaka mwana-bakala ya bamvula kumi na zole. Yina bibuti ya yandi lendaka kuzwa vwandaka kaka samu na kuzwa dimpa mpe nsuni samu na mvula. Ba lendaka ve kufuta mbongo ya lipaso.

<sup>107</sup> Bankalani ya bawu nionso, vukanaka, mutindu ba monaka ti Benny ya fioti vwandaka meka na kusakana na bana ya fioti

kuna na nganda, yandi vwandaka mpofo. Yandi lendaka ve kumona yina yandi vwandaka kusala. Ya salaka bawu mpasi na ntima. Mpe bawu nionso, na mvula yina, tulaka na lweka mwa ndambu ya bambuma ya bilanga ya bawu. Bawu salaka fioti mingi na nsi ya mwini. Mpe ntangu ba tekisaka bambuma ya bilanga ya bawu na automne, ba bakaka mbongo mpe tulaka Benny ya fioti na train, mpe fidisaka yandi na dokotolo.

<sup>108</sup> Lipaso simbaka mbote-mbote. Mpe ntangu yandi vutukaka, bankalani nionso vukanaka kintwadi samu na kuyamba yandi ntangu Benny ya fioti vwandaka tuluka na train. Mwa meso ya yandi ya fioti, vwandaka sema. Ntangu yandi talaka bawu, yandi bandaka na kudila mpe kuboka.

<sup>109</sup> Mosi ya bantwadisi tubaka, “Mwana, lipaso yina me lomba nge mbongo yikwa?”

<sup>110</sup> Yandi tubaka, “Tata, mu zaba ve yikwa ya me lomba na bantu yayi. Kasi mu ke na kiese ti mu ke mona bizizi ya bawu, yina futaka ntalu.”

<sup>111</sup> Ya ke mutindu yina beto ke kuwaka. Mu zaba ve yina Ya ke lomba na Nzambi. Mu zaba ti Yandi pesaka munu ya kulutila mbote Yandi vwandaka na yawu, Mwana ya Yandi. Kasi mu ke vutula matondo mingi na kuvwanda na kumona ya kimpeve, ti mu lendaka tala na kizizi ya Yandi mpe kuzaba ti Yandi kufwaka samu na munu. Mu zaba ve yina Ya lombaka Yandi. Beto ke na mutindu ya kufwanikisa yawu. Ntalu kele nene mingi. Mu lendaka tuba na beno ve mutindu yawu kele. Kasi mu ke vutula matondo. Mu ke vutula matondo, ti, ntete mu vwandaka mpofo, ntangu yayi mu me mona.

<sup>112</sup> Mu ke vutula matondo ti ntangu Bampangi Mayo tubaka na munu ti ntangu ya munu me lunga, ntangu badokotolo tubaka na munu ti mu lendaka ve kuzinga diaka, bamvula makumi zole na tanu me luta, mu ke zinga bubu yayi. Mu zaba ve yina ya lombaka na Nzambi, kasi mu ke vutula matondo ti mu ke zinga.

<sup>113</sup> Ntete mu vwandaka nsumuki, ya kukangama na disumu, na bampasi, na boma ya lufwa. Kasi, bubu yayi, lufwa kele lunungu ya munu. Alleluia! Ya ke nata munu kaka na Mvwandulu ya Yandi yina mu ke zolaka, ti mu lendaka tala kizizi ya Yandi. Yandi sobaka diambu, na nzila ya lipaso, Yandi bakaka ntima ya munu mpe me kumisa yawu ya malu-malu. Mu zaba ti kima mosi me salama na munu.

<sup>114</sup> Na automne me luta, na zulunale ya Minnesota, ya vwandaka na mwana-bakala mosi yina kwendaka na yinzo-Nzambi na velo na suka mosi, na lukolo ya Lumingu. Bakala yankaka ya ntwenia na nziunga, yandi vwandaka kipe ve lukolo ya Lumingu, yandi bakaka nkundi ya yandi ya kento mpe ba kwendaka sietumuka na galasi. Mpe bakala yayi vwandaka mbuta, mpe yandi kotaka na kati ya galasi mpe yandi kubwaka. Yandi vwandaka seka mwana-bakala yina ya fioti na suka yina ntangu

yandi vwandaka kwenda kuna na bala-bala, yandi tubaka na nkundi ya yandi ya kento, yandi tubaka, “Yina kele nkonga ya bafanatiki yina ke kwendaka na yinzo-Nzambi yina.” Mpe ntangu yandi kubwaka na kati ya galasi, nkundi ya yandi ya kento vwandaka ntama fioti na yandi. Yandi vwandaka fioti; yandi basikaka. Kasi ntangu yandi basikaka mpe tulaka maboko ya yandi na zulu ya galasi, yandi vwandaka lenda ve, mpe yandi vwandaka baluka na zulu ya galasi.

<sup>115</sup> Nkundi ya yandi ya kento vwandaka meka na kusimba yandi, kasi yandi vwandaka kilo mingi, galasi vwandaka bukana pene-pene ya yandi. Yandi bokaka na yandi, “Vutuka na manima! Vutuka na manima! Nge ke kubwa kaka na masa mpe beto zole ke dinda.” Yandi vwandaka boka, yandi vwandaka dila, mpe kima ve lendaka sadisa yandi.

<sup>116</sup> Na manima ya mwa ntangu fioti, kuna na zulu ya mongo, vwandaka kwisa mwa velo mosi, yina mwana-bakala mosi ya fioti vwandaka lúka, na Biblia na nsi ya dipeka. Yandi kuwaka kuboka, mpe yandi yikaka vitesse na mwa velo ya yandi. Yandi tululaka Biblia ya yandi na ntoto, mpe yandi kwendaka mbangu na galasi. Yandi kumvulaka na mwa kivumu ya yandi ya fioti, yandi vwandaka me lwata bilele ya yandi ya mbote, tii yandi simbaka maboko ya bakala yina, mpe yandi bandaka na kubenda yandi na kuvutukaka na manima, tii yandi basisaka yandi na galasi. Yandi kimaka mbangu mpe yandi telemisaka tomabilu mosi. Ba bokilaka ambulance mpe ba nataka yandi na lupitalu.

<sup>117</sup> Na manima yandi kwendaka mpe futaka mbongo na ambulance, yandi futaka facture ya badokotolo samu na bantunga yandi bakaka samu na pneumonie, yandi kwendaka mona mwana-bakala yina. Yandi tubaka, “Mwana, yinki mu ke pesa nge?”

Yandi tubaka, “Kima mosi ve.”

<sup>118</sup> Yandi tubaka, “Mu ke pesa nge luzingu ya munu.” Beno banza na yawu. Mbongo lendaka ve kusumba yawu. Ya vwandaka luzingu ya yandi.

<sup>119</sup> Mutindu yina beto lendaka vwanda na ntwala ya Nzambi. Ya kele ve kumeka na kuzwa kima mosi na kufuta mbongo; kasi beto ke pesa na Nzambi luzingu ya beto, samu beto vwandaka kufwa mpe vwandaka dinda na dibulu ya disumu. Nzambi me kanga munu na maboko ya Yandi mpe me lwatisa munu robe.

Mu vwandaka ya kudinda na disumu,  
Na disumu ya ndombe mingi,  
Ya kudinda mingi,  
Mu vwandaka dinda kukondwa kivuvu;

Kasi Mulongi ya mubu  
 Kuwaka kuboka ya munu ya mawa,  
 Yandi kwisaka basisa munu na kati ya masa,  
 Ntangu yayi mu kele na lukengolo.

<sup>120</sup> Mu ke pesa Yandi luzingu ya munu. Beno pesa Yandi luzingu ya beno. Beno pesa Yandi luzingu ya beno, samu na kusadila Yandi; kele ve kupesa yawu, kutambula bisika nionso na kukumisaka yinzo-Nzambi ya beno; kele ve kukwenda bisika nionso mpe kusawula bayankaka; kasi kumeka na kusadila mpe kuvulusa bayankaka, mpe kunata bawu na luzabu ya Mfumu Yesu Klisto.

<sup>121</sup> Mwana yina zimbanaka. Samu na kumanisa, mu zola tuba mutindu yayi. Ntangu yandi bebisaka bima ya yandi nionso, bima ya tata ya yandi, na kuzingaka na pité, mpe ntangu yandi vwandaka vutuka na yinzo. . . Yandi vwandaka ya kulala na yinzo ya bangulu, mpe yandi vutukaka na yandi mosi. Mpe yandi tubaka, “Bisadi yikwa, na yinzo ya tata ya munu, yina kele na bima mingi, mpe awa, mu ke kufwa na nzala.” Yinki zolaka salama kana yandi tubaka, “Mu ke kukiyufula kana mu ke na mbongo samu na kuvutula na tata (yina mu me bebisa) na kuzingaka na mubulu?” Kasi yandi zabaka ti nkadulu ya tata ya yandi, mpe yandi tubaka, “Mu ke telama mpe mu ke kwenda na tata ya munu.”

<sup>122</sup> Tata tubaka ata fioti ve, “Vingila fioti, mwana! Nge me natila munu mbongo ya munu?” Ve. Yandi futisaka yandi facture ve ata fioti samu na masumu ya yandi. Yandi vwandaka na kiese ti yandi me vutuka. Yandi vwandaka na kiese ti yandi me vutuka na yandi mosi, samu yandi vwandaka mwana ya yandi. Yandi vwandaka mwana ya yandi mosi. Yandi vwandaka na kiese ti yandi bakaka lukanu ya kuvutuka na yinzo. Ntangu yayi, yandi vwandaka tangila yandi disumu ve, kasi yandi vwandaka na kiese ntangu yandi vutukaka na yandi mosi mpe tubaka, “Mu sumukaka na ntwala ya Nzambi, mpe na ntwala ya tata ya munu. Mu ke telama mpe mu ke kwenda na yandi.”

<sup>123</sup> Mpe ntangu yandi monaka yandi, ntama kuna, yandi kwendaka mbangu mpe yandi yambaka yandi. Mpe yandi tubaka, “Beno kufwa mwana-ngombe ya mafuta,” kukondwa mbongo. “Beno nata robe ya kulutila kitoko,” kukondwa mbongo. “Beno nata lupete,” kukondwa mbongo, “beno lwatisa yandi na musapi. Beto kudia, beto kunwa, mpe beto sepela, samu mwana ya munu yayi zimbanaka me monana ntangu yayi. Yandi kufwaka, mpe yandi me vutuka na luzingu. Beto sepela samu na yawu.”

<sup>124</sup> Bankundi ya munu, beno bika mu tuba mutindu yayi, samu na kumanisa. Kima mosi kaka ke katulaka nsatu, bima yina kaka kele ya kieleka, bima yina kele kaka ya mbote, ba lendaka ve kusumba yawu na mbongo. Ya kele makabu ya mpamba ya

Nzambi, na nzila ya Yesu Klisto: mpulusu ya moyo; kiese. Beno kwisa mpe beno kudia, mpe beno fuluka.

*Samu na yinki beno ke bebisa mbongo na kima yina kele dimpa ve? mpe na manima nzala ke simba beno diaka? beno kuwa munu mbote, mpe beno ke kudia. . . yina kele mbote, mpe moyo ya beno ke lekita madia ya kitoko.*

*Beno kuwa munu mbote, mpe beno kwisa na munu: beno kuwa, mpe moyo ya beno ke zinga; mpe mu ke sala ngwisani ya kukonda nsuka na beno, samu na kulandila kaka na kupesa beno mambote nionso mu silaka na David.*

<sup>125</sup> Bima yina nionso ke wumelaka, bima yina nionso kele ya mbote, bima yina nionso kele kitoko, bima yina nionso kele ya Kukonda nsuka, kele ya mpamba, mpe ya ke lomba kima mosi ve. Na nsuka ya masonama ya Buku yayi, ya me tuba, “Yina nionso me zola, yandi kwisa mpe yandi kunwa Bamasa ya bayinto ya Luzingu, ya mpamba,” kukondwa mbongo, kukondwa ntalu. Samu na yinki beno ke bebisa mbongo ya beno na bima yina ke katulaka nsatu ve, mpe beno ke bika bima ya kieleka yina ke katulaka nsatu, yina kele ya mpamba, kuluta pene ya beno kukondwa kuzaba?

Beto sambila.

<sup>126</sup> Na yina beno ke sambila na pima nionso, ya kele, na kati ya kivinga yayi, na suka yayi, bayina me kunwa ve na Yinto yina, yina bansatu ya yinza kele kaka na luzingu ya beno, mpe beno ke zola kusoba kisika ya beno ya kunwa, na suka yayi, to kubaka ndandu yankaka samu na mbongo ya beno? Beno zola kwisa mpe kusumba na Nzambi, (kukondwa mbongo, kukondwa ntalu), mafuta ya niosi, bakiese ya vinu? Beno zola telemisa diboko ya beno, samu na kutuba, “Bambuka moyo na munu, Mpangi Branham, na yina nge ke sambila”? Nzambi sakumuna nge, tata. Nzambi sakumuna nge, tata. Nzambi sakumuna nge, mpangi-kento. Ya kele na bayankaka yina ke tuba, “Bambuka moyo na munu, Mpangi Branham, na yina nge ke sambila”?

<sup>127</sup> Bayankaka na kati ya beno bantwenia, yinga, yina me bebisa bima ya beno. Bangunga yina mama lutisaka na kusambila samu na beno, mpe papa, malongi nionso yina ya longaka beno, mpe kasi beno me pesa yawu mukongo, samu na kuwa mwita ya diabulu. Ntangu yayi beno ke sepela na musiki ya yinza, bima ya yinza. Mpe beno me vutuka na beno mosi, mutindu mwana yina zimbanaka na kati ya yinzo ya bangulu. Beno zola telemisa diboko ya beno, mpangi-kento, mpangi-bakala, mpe kutuba, “Nzambi, bambuka moyo na munu. Vutula munu na munu mosi, na suka yayi, bika ti mu vutuka na yinzo ya Tata”? Ya ke lomba beno kima mosi ve. Yandi ke vingila beno. Kukondwa kukipe yina beno me sala, “Ata ti masumu ya beno kele mbwaki

mutindu ngola, yawu ke kuma mpembe mutindu mvula mpembe; mbwaki mutindu tukula, yawu ke kuma mpembe mutindu mika ya mpembe ya dimeme.” Ya kele na bayina na Mvwandulu ya Nzambi, yina zola telemisa maboko ya bawu?

<sup>128</sup> Bayina kele bambevo mpe na nsatu, beto tuba, “Mu—mu me kubwa na dibulu. Satana me—me sala munu yimbi. Yandi me kumisa munu kikata mpe yandi me kumisa munu mbevo, to kima mosi. Mu ke zola, na suka yayi, muniololo ya Nzambi ya lukwikilu kukulumuka na kati ya ntima ya munu, yina ke basisa munu na dibulu yayi, mutindu bakala yina na mwelo yina ba bokilaka Belle.” Beno telemisa maboko ya beno. Nzambi sakumuna, beno nionso.

<sup>129</sup> Mfumu, mu ke nata na Nge, na ngunga yayi, bayina me telemisa maboko ya bawu, samu na mulemvo ya masumu ya bawu. Nge kele Nzambi, mpe Nzambi mosi kaka. Kaka kisika ba me vwanda na ntangu yayi, ya ke kisika yina Nge me tuba na bawu. Ya ke kisika yina Nge me ndimisa bawu ti ba me sala yimbi, ntangu Ndinga me kuzwa kisika ya Yawu, mpe Mpeve-Santu me banda na kutuba, mpe kutuba, “Nge me sala yimbi. Baluka, mpe vutuka diaka na Nzambi Tata.” Mpe ba me telemisa maboko ya bawu, samu na kutalisa ti ba ke zola basika na yinzo yayi ya ntoto ya bangulu, samu na kukwisa na yinzo ya Tata, kisika bima kele ya kufuluka, kisika ba ke nata kima mosi ve. Mutindu poète me tuba yawu mbote, “Mu ke na kima ve ya kunata, kasi na kulunsi ya Nge mu ke zola kuvwanda.” Bika ti bawu kwisa, na lembami, na kukikulumusasa, mpe kuvwanda ya kundima, mpe samu na kupesa nge baluzingu ya bawu. Mpe Nge ke nata robe ya kulutila kitoko; mpe lupete mosi, mpe ke tula yawu na misapi ya bawu; mpe disa bawu na Mana ya Mwana-dimeme yina kufwaka. Pesa yawu, Mfumu.

<sup>130</sup> Ya kele na bayina kele ya kubela mpe kele na mpasi. Bawu kele na nsatu. Satana me losa bawu na dibulu, na ntembe ve, ba kele ve na mbongo ya lipaso. Na ntembe ve ti, ntangu yankaka, mingi na kati ya bawu lendaka luta ve na lipaso. Ya lendaka vwanda ti munganga lendaka ve kukatula mpasi yango, ata ti yandi kele na mbongo mingi. Kasi Nge kele Nzambi. Mpe mu ke sambila ti na ngunga yayi, na nsi ya kupakulama ya Mpeve-Santu yina kele awa na ntangu yayi, ti Nge ke belula mosi na mosi ya bawu. Bika ti bawu beluka, kubanda na yintu ya bawu tii na makulu ya bawu, ya muvimba.

<sup>131</sup> Kana bawu kele ve na kiese; mpulusu ya bawu, ba lendaka diaka ve kusepela na yawu. Mutindu David tubaka, na ntangu me luta, “Vutula na munu kiese ya mpulusu ya munu.” Bika ti bawu kuzwa kiese mpe nsayi, kisika ba vwandaka na mawa mpe ya kulemba, samu Nge kele Ditadi na ntoto ya kuyuma. Nge kele kisika ya kubumbama na ntangu ya kitembo. Ntangu diabulu ke losa na zulu ya bawu bimbevo nionso mpe ba-missile, Nge kele kisika ya kubumbama na ntangu ya kitembo. Bika yawu vwanda

mutindu yina, bubu yayi, Nzambi, samu beto ke lomba yawu na Nkumbu ya Yesu. Amen.

Na lembami mpe na lutondo Yesu ke bokila,  
Ke bokila beno, ke bokila munu;  
Disumu ya beto, Yandi me lemvokila yawu na  
lemvo ya Yandi,  
Yandi ke lemvokila beno mpe ke lemvokila  
munu.

Beno kwisa . . .

<sup>132</sup> Ntangu yayi, kana beno zola, beno kwisa na autel mpe beno fukama, beto ke sambila na beno, ke pakula beno mafuta, beto ke sala nionso yina beto lendaka sala. Kukwisa ya mbote na beno.

. . . ya kulemba, beno kwisa na munu;  
Na lembami, na lutondo, Yesu ke bokila,  
Yandi ke bokila, O nsumuki, kwisa!

<sup>133</sup> Beno zola Yandi? Teddy, nge lendaka pesa beto note, “Mu zola Yandi, mu zola Yandi samu Yandi zolaka munu ntete.” Nge lendaka bula yawu?

<sup>134</sup> Beto yimba yawu samu na nkembo ya Yandi, na ntwala beto ke soba ndonga ya lukutakanu, na mwa ntangu fioti. Yayi kele kusambila. Nsangu me basika. Mu ke na kiesa ti beno me ndima Yawu. Mu ke sambila ti Ya ke sala beno mbote, mutindu ya salaka munu mbote na kuzonzila Yawu. Mu ke sambila ti lutwadusu mosi yina ya kimpeve yina ba pesaka munu, samu na kusamuna Yawu na beno, beno me ndima Yawu na lutwadusu mosi ya kimpeve ba me fidisaka Yawu. Bika ti Mfumu sakumuna Yawu na ntima ya beno. Mbote mingi.

Mu zola Yandi,

Ntangu yayi beno kanga meso ya beno, mutindu beto ke yimbila. Beno telemisa maboko ya beno.

Mu zola Yandi  
Samu Yandi zolaka munu ntete  
Mpe futaka mpulusu ya munu  
Na yinti ya Calvaire.

<sup>135</sup> Ntangu yayi beto kulumusa bayintu ya beto, beto niunguka yawu. Beno zola Yandi? Yandi kele ya kieleka na ntima ya beno? Ya kele ve na kima mosi na Yandi, yina kele kaka ya kieleka? Mu zola Yandi samu Yandi zolaka munu ntete, Yandi losaka nsinga ya Lusalusu kuna na Calvaire, Yandi kangaka Yawu na ntima ya munu.

<sup>136</sup> Beno zimbana ve, Mpangi Drummond ke longa samu na beto na nkokila yayi, na nkokila ya mbundana. Kana beno ke zolaka Mfumu, beno kwisa kubaka mbundana na beto. Kana Mfumu kuzola, mu ke vwanda awa na beno. Yina kele bokilo ya Mpangi Tony Zabel; Mpangi Thom ya Afrique; mwana ya yandi, mwana-

bakala ya mbote; Muklisto ya kieleka, ya kukwikama, longi mosi ya fioti ya mbote.

Samu Yandi zolaka munu ntete  
Mpe futaka mpulusu ya munu  
Na yinti ya Calvaire.

<sup>137</sup> Na ntangu beto me kulumusa bayintu ya beto, mutindu piano ke landila na kubula.

<sup>138</sup> Mfumu Yesu, beto ke zola kukota na kisalu yankaka, Mfumu. Beto ke tonda Nge samu na Mpeve-Santu yina me tuba na bantima ya beto. Mpe beto kele na kiese, Mfumu, ti Nge me sala yayi samu na beto. Mpe bika ti Ndinga ya Nge kuvutuka ve na Nge ya mpamba, kasi bika Yawu lungisa kisalu ya Yawu. Bika ti Yawu kuvwanda na kati ya bantima ya beto nionso, samu beto kuzaba ti bima nionso ya kieleka mpe bima yina ke wumelaka ke katukaka na Nzambi, kukondwa mbongo, kukondwa ntalu. Samu na yinki beto ke zola kusala kingolo-ngolo samu na bima yayi, mpe kusala yawu diambu ya luzingu to lufwa, samu na bima yayi ke kufwa? Beto sala diaka kingolo-ngolo, Mfumu, samu na bima yina ke kufwa ve, yina kele na ntalu ve. Ntalu ba me futa ya mpamba, mpe ba me bokila beto, “Yina nionso me zola, yandi kwisa.”

<sup>139</sup> Sakumuna kitini yina ke kwisa ya lukutakanu yayi. Pesa yawu, Mfumu. Mpe vukana na beto na nkokila yayi. Sakumuna kisalu ya mbotika. Bika ti ya vwanda na kutiamuka ya nene. Bika ti bantu yayi, bayina ke baka mbotika na Nkumbu ya Mwana ya Nge ya luzolo, Mfumu Yesu, bika bawu kuvwanda ya kufuluka na Mpeve-Santu. Bika ti bantu yayi, bayina me telemisa maboko ya bawu, samu na kubalula ntima, na suka yayi, na masumu ya bawu, bika ti bawu kwisa, bawu kulwata bilele ya mbotika, mpe bawu kulumuka na baptistère, mpe bawu talisa na yinza ti ba me lemvokila bawu masumu ya bawu. Mpe ba me botama, samu na mulemvo ya yawu ti ya vwanzama na buku. Pesa yawu, Mfumu.

<sup>140</sup> Vwanda na Mpangi Drummond na nkokila yayi na ntangu yandi ke nata nsangu ya mbote, yina me katuka na Kiti ya kimfumu. Pakula yandi na Mpeve-Santu. Mpe vwanda na beto na ntangu beto ke baka mbundana. Bika ti bantima ya beto kuvwanda kukondwa mvindu mpe ya santu, bika ti ya vwanda ve na mvindu na kati ya beto. Bika ti Menga ya Yesu kusukula beto na masumu nionso. Pesa yawu, Tata. Nata bimbevo ntama na beto, mpe pesa beto kiese mpe ngemba. Na Yesu Klisto beto ke lomba yawu. Amen.

Mu zola . . .

<sup>141</sup> Beno zola Yandi? Ntangu yayi beno telemisa maboko ya beno na Yandi.

Mu zola Yandi  
Sa- . . .



Ntangu yayi beno tanda diboko mpe beno pesa mbote na muntu yina kele pene-pene ya beno.

. . . ntete . . . (Russell, mu zola Yandi. Kana mu kufwa bubu yayi, mu zola Yandi.)

Mpe futaka . . .

Ya kele mbote, beno tanda diboko mpe beno pesa mbote na bayina kele pene-pene ya beno.

. . . mpulusu  
Na Calvaire . . .

Mbote mingi, Mpangi Neville, na ndinga ya yandi. Mbote mingi.



*KUKONDWA MBONGO TO KUKONDWA NTALU* KNG59-0802

(Without Money Or Without Price)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 2 ya Ngonda ya nana, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)